



Georgius apud Vuirtenbergicos ex nobili fa-
 milia Hochenheimiorū (qui Bombasti co-
 gnominantur) natus est anno 1500. Is cum à parēti-
 bus in omni genere uirtutum & literarum cum fra-
 tribus educatus esset, ad Maximiliani Cæsaris cu-
 riam peruenit, & inter Cubiculi pueros receptus
 fuit. adolescens uerò factus armorū studia dilexit,
 atq; sub Carolo Geldriæ duce prima stipendia me-
 ruit. postea quoq; Francisco Galliarū regi in bellis
 Italicis & Belgicis adfuit, & magnā rei bellicæ pe-
 ritiam sibi comparauit. Itaq; in patriam reuersus,
 cum rusticorū tumultus passim esset excitatus 1525,
 Ernestus Marchio Badensis ei Hochburgensem

munitissimam Brisgaudię arcem commendauit, atq; eius opera & consilio us-
 us, eas turbas sine sanguinis effusione compescuit. Postea quoq; huius soro-
 rem uxorem duxit, & eam familiam plurimū extulit. Pace autem recupera-
 ta Georgius contra Christiani nominis hostes arma induere statuit, atq; Rho-
 diorum equitum ordinem Viterbī suscepit. Inde cum alijs in Melitā insulam
 profectus, in eo loco aliquandiu habitauit, atq; multa sua uirtutis documenta
 reliquit. Postea in Germaniam redijt, atq; huius ordinis ædes Sultzij, Colma-
 riæ, Dorleshemij, & Basileæ administrauit. quin etiam sui ordinis nomine in
 Vngariam militatum abiit, & turmæ equitum præfectus fuit. Cum itaq; ipse
 magna prudentia & rei militaris peritia longo usu insignis esset, à summo or-
 dinis Magistro Melitam reuocatur, & in ea insula Architectonicæ præficitur.
 Itaq; cum uideret Barbaros potentem hostem insulæ portum facile cum clas-
 se occupare posse, ad ingressum statim munitissimam illam arcem, quam S. Er-
 mo uocant, a fundamentis ædificauit, atq; 1550 primus ibi præfectus existens,
 eam multis propugnaculis & tormentis bellicis muniuit. id quod postea sæ-
 pius ordini summum præsidium extitit. Ab eo tempore, quo ordinem susce-
 pit, subinde partium Cæsareanarum fuit, & aliquoties expeditionibus Caroli
 Imperatoris interfuit. Inde 1553 in Germaniam redijt, & commissarum ædium
 administrationem singulari dexteritate continuauit.